

ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅՈՒՆ

Ո Ր Ո Շ ՈՒ Մ

19 նոյեմբերի 2015թ.

N 775-Ն

ք.Ստեփանակերտ

ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆ
2009 ԹՎԱԿԱՆԻ ՍԵՊՏԵՄԲԵՐԻ 18-Ի N 588-Ն ՈՐՈՇՄԱՆ ՄԵՋ
ՓՈՓՈԽՈՒԹՅՈՒՆ ԿԱՏԱՐԵԼՈՒ ՄԱՍԻՆ

«Իրավական ակտերի մասին» Լեռնային Ղարաբաղի Հանրապետության օրենքի 71-րդ հոդվածին համապատասխան՝ Լեռնային Ղարաբաղի Հանրապետության կառավարությունը **որոշում է**.

1. Լեռնային Ղարաբաղի Հանրապետության կառավարության 2009 թվականի սեպտեմբերի 18-ի «Հողօգտագործողներին պետակա նաջակցություն տրամադրելու մասին» N588-Ն որոշման հավելվածը շարադրել նոր խմբագրությամբ՝ համաձայն հավելվածի:

2. Սույն որոշումն ուժի մեջ է մտնում պաշտոնական հրապարակմանը հաջորդող օրվանից, իսկ դրա գործողությունը տարածվում է 2015 թվականի նոյեմբերի 1-ից հետո ծագած հարաբերությունների վրա:

ԼԵՌՆԱՅԻՆ ՂԱՐԱԲԱՂԻ
ՀԱՆՐԱՊԵՏՈՒԹՅԱՆ ՎԱՐՉԱՊԵՏ

Ա. ՀԱՐՈՒԹՅՈՒՆՅԱՆ

Հավելված
Լեռնային Ղարաբաղի
Հանրապետության կառավարության
2015 թվականի նոյեմբերի 19 -ի
N 775-Ն որոշման

«Հավելված
Լեռնային Ղարաբաղի
Հանրապետության կառավարության
2009 թվականի սեպտեմբերի 18-ի
N 588-Ն որոշման

ԿԱՐԳ
ՍԵՎ ՑԵԼԻ ՄՇԱԿՈՒԹՅԱՆ ԵՎ ՀՈՂՕԳՏԱԳՈՐԾՈՂՆԵՐԻՆ
ՊԵՏԱԿԱՆ ԱԶԱԿՑՈՒԹՅՈՒՆ ՏՐԱՄԱԴՐԵԼՈՒ

I. ԸՆԴՀԱՆՈՒՐ ԴՐՈՒՅԹՆԵՐ

1. Սույն կարգով կանոնակարգվում են Լեռնային Ղարաբաղի Հանրապետությունում սև ցելի մշակության և խնամքի համար հողօգտագործողներին պետական աջակցության տրամադրմանն ուղղված միջոցառումների (այսուհետ՝ միջոցառում) իրականացման հետ կապված հարաբերությունները:

2. Սույն կարգի իմաստով օգտագործվող հիմնական հասկացություններն են՝

1) պեդական աջակցություն՝ սև ցելի մշակության և խնամքի համար ծախսված գումարի մասնակի փոխհատուցում կամ այդ գումարին համարժեք քանակության աշնանացան ցորենի սերմի կամ հանքային պարարտանյութերի տրամադրում.

2) սև ցելի մշակություն և խնամք՝ հողատարածքների խոզանի երեսվար, խոր վար (ցրտահերկ) և ցելադաշտի գարնանային ու ամառային խնամքի աշխատանքներ: Խոր վարը կատարվում է ուշ աշնան կամ ձմեռային ամիսներին: Գարնանը, առաջին իսկ հնարավորության դեպքում, հողում խոնավությունը պահպանելու համար, անհրաժեշտ է հողը փոցխել, որից հետո 20-25 օրվա ընթացքում ծլած մոլախոտերը ոչնչացնելու համար կատարել կուլտիվացիա 10-12 սանտիմետր խորության վրա: Կախված բնակլիմայական պայմաններից, այս աշխատանքները պետք է կատարել 20-25 օրը մեկ անգամ, աստիճանաբար պակասեցնելով փոցխումների խորությունը, հասցնելով՝ նախացանքային մշակումը 6-8 սանտիմետր, իսկ չորային պայմաններում՝ 5 - 6 սանտիմետր.

3) սև ցելի մշակության և խնամքի համար պեդական աջակցության մասնակից՝ միջոցառման իրականացման գործընթացում ներգրավված պետական և տարածքային կառավարման մարմինները:

II. ՀՈՂՕԳՏԱԳՈՐԾՈՂՆԵՐԻՆ ՊԵՏԱԿԱՆ ԱԶԱԿՑՈՒԹՅՈՒՆ ՏՐԱՄԱԴՐԵԼՈՒ ԳՈՐԾԸՆԹԱՑԻ ԿԱԶՄԱԿԵՐՊՈՒՄԸ

3. Միջոցառման իրականացման գործընթացում ներգրավված պետական և տարածքային կառավարման մարմինները իրականացնում են հետևյալ միջոցառումները՝

1) Լեռնային Ղարաբաղի Հանրապետության գյուղատնտեսության նախարարությունը (այսուհետ՝ նախարարություն) համակարգում և վերահսկողություն է իրականացնում գործընթացի նկատմամբ:

2) Լեռնային Ղարաբաղի Հանրապետության շրջանների վարչակազմերը՝ յուրաքանչյուր տարի մարտի 1-ին և հուլիսի 1-ին, նախարարություն են ներկայացնում տեղեկություններ՝ նշելով համայնքը և սև ցելի տակ մշակված տարածքների մակերեսները:

4. Միջոցառման իրականացման գործընթացում ներգրավված տեղական ինքնակառավարման մարմինները, շրջանի վարչակազմի սահմանած ժամկետներում, հիմք ընդունելով հողօգտագործողների վարելահողերի սև ցելի մշակության և խնամքի մասին դիմումները, անշարժ գույքի նկատմամբ սեփականության կամ վարձակալության իրավունքի պետական գրանցման վկայականների (վկայականի բացակայության և անհատույց կամ մշտական օգտագործման իրավունքով հատկացված վարելահողերի վրա սև ցել կատարելու դեպքում, համայնքի ղեկավարի կողմից տրվում է համապատասխան տեղեկանք) և անձնագրերի պատճենները, շրջանի վարչակազմ են ներկայացնում տեղեկանք՝ նշելով հողօգտագործողի անունը, ազգանունը, հայրանունը, անշարժ գույքի նկատմամբ սեփականության կամ վարձակալության իրավունքի պետական գրանցման վկայականի համարը և սև ցելի տակ դրված տարածքի մակերեսը:

5. Պետական աջակցություն տրամադրվում է համայնքի վարչական սահմաններում սեփականության ու վարձակալության (մեկ հողօգտագործողին վարձակալության իրավունքով հատկացված վարելահողերի համար ոչ ավելի քան 25 հեկտար) և անհատույց (մշտական) օգտագործման իրավունքով հատկացված վարելահողերի համար՝ 1 հեկտարի դիմաց 40 000 (քառասուն հազար) ՀՀ դրամիչափով՝ միանվագ գումարի տեսքով կամ այդ գումարին համարժեք քանակության աշնանացան ցորենի սերմի կամ հանքային պարարտանյութերի տեսքով:

6. Աշնանացան ցորենի սերմը տրամադրվում է «Սերմնաբուծության, սելեկցիոն նվաճումների փորձարկման, պահպանության և սերմերի որակի ստուգման կենտրոն» փակ բաժնետիրական ընկերության կողմից 2015 թվականին արտադրված առաջին վերարտադրության սերմից, իսկ հանքային պարարտանյութերը՝ Լեռնային Ղարաբաղի Հանրապետության գյուղի և գյուղատնտեսության աջակցության հիմնադրամի միջոցով:

7. Աշնանացան ցորենի սերմը կամ հանքային պարարտանյութերը հողօգտագործողներին հատկացվում են նախարարության կողմից տրամադրված ցուցակի հիման վրա:

8. Նախարարությունը՝ հիմք ընդունելով սույն կարգի 3-րդ կետի 2-րդ ենթակետում նշված տեղեկությունները, իրականացնում է սույն կարգի 5-րդ կետում նշված գումարի փոխհատուցումը կամ աշնանացան ցորենի սերմի կամ հանքային պարարտանյութերի ֆինանսավորումը՝ յուրաքանչյուր տարվա պետական բյուջեում նախատեսված համապատասխան միջոցներից:»:

**ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅԱՆ
ԿԱՌԱՎԱՐՈՒԹՅԱՆ ԱՇԽԱՏԱԿԱԶՄԻ
ՂԵԿԱՎԱՐ-ՆԱԽԱՐԱՐԼ. ԳՐԻԳՈՐՅԱՆ**